



30. juli 2015

Inatsisartut Suleriaasianni § 37 naapertorlugu apeqqutit imaattut matumuuna saqqummiuppakka:

Naalakkersuisunut apeqqut:

1. Periarfissaqassanerluni inatsisitigut periuseqarnikkullu malittarisassiornissaq qularnaa-rumallugu inunnik isumaginninnermut pisorta qarfiit ilisimatinneqartarnissaat, paasi-neqarpat angajoqqaq 18-t inorlugit ukiulimmik qitornalik aanngajaarniutit pillugit inatsimmik unioqqutitsisimasoq?

2. Taamaaliortoqarsinnaappat taava malittarisassat naalagaaffeqatigiinnit imaluunniit Namminersorlutik Oqartussanit aalajangersarneqarsinnaassanerlutik?

(Inatsisartunut ilaasorta q Tillie Martinussen, Demokraatit)

Tungavilersuut

"Kalaallit Nunaanni inuusuttut inuunerat 2011-mi"¹ misissorneqarmat tagginneqarpoq inuusuttut tallimaangaangata ataatsip ilaqqat qanigisat akornanni ikiaroorartumik hashimik atornerlu-isoqartoq misigisarsimagaa; inuusuttut quliungaangata ataatsip nalunaarutigisarpaa angajoqqaat akornanni ikiaroorartumik hashimik atornerluisoqartoq. Taakku inuusuttut affaasa angajoqqaat ikiaroorartumik hashimik atornerluinerat toqqissisimangissutigisarsimavaat. Misissuinermit taaguutilimmik "Kalaallit Nunaanni meeqqat"² meeqqat 13 %-ii misigisimapput, peroriartorlutik ilaqutariinni, angajoqqaap/inooqataasup aappaa imaluunnii tamarmik ikiaroorartumik hashimik atornerluisuusut.

Inuiaqatigiittut akisussaaqataaffigaarput, meeqqat toqqissisimanartunik sinaakkuteqarlutik peroriartornissaat.

¹ C. Pedersen, P. Bjerregaard: "Det svære ungdomsliv i Grønland 2011 – en undersøgelse om de ældste folkeskoleelever (2012)

² E. Christensen, L. Kristensen, S. Baviskar: "Kalaallit Nunaanni meeqqat - Meeqqat 0-imiit 14-it ilanngullugit ukiullit ilagutariillu atugarissaarnerannik misissuineq" (2008)



Angajoqqaat ikiaroonartumik hashimik atonerluisuunerat imatut ineriartorsinnaavoq allaat qitornamik isumassorneqarnissaat, qanilaarfigineqarnissaat aamma toqqissisimanissaat isumagisinnaajunnaarlugu. Aamma ikiaroonartumik hashimik atonerluinerup ilaqutariit aningaasaqarnerat ulorianartorsiortissinnaavaa taamaasillunilu meeqqat nerisassanik, atisassanik allanillu pisariaqartitaminnik isumagineqarnissaat pisinnaajunnaartarpoq.

Taamaattumik pingaartorujussuuvoq inunnik isumaginnittoqarfiit ikiuutigasuarsinnaasarnissaat, angajoqqaat ikiaroonartumik hashimik atonerluinerisa meeqqap inuunera ulorianartorsiortilissappagu. Aamma uani pingaaruteqarpoq sapinngisamik piaartumik iliuuseqartoqartarnissaa.

Taamaattumik soqutigaara periarfissaqarnersoq malittarisassiortoqarnissaa, qularnaarumallugu inunnik isumaginninnermut pisortaqarfiit ilisimatinneqartarnissaat, paasineqarpat angajoqqaq 18-t inorlugit ukiulimmik qitornalik aanngajaarniutit pillugit inatsimmik unioqqutitsisimasoq.